

東
華
續
錄

東華續錄

乾隆五十二

臣王先謙敬編

臣周繼蕃恭校

秋七月甲辰戶部議覆湖北布政使公泰奏道員向有參政參議副使僉事等銜俸銀分別三四五品支給乾隆十八年奉旨俱爲正四品停其兼銜品級既經改正食俸應照品級今查湖北河南陝西等省道員原編俸銀照三品一百三十兩者九缺江蘇省九十五兩者一缺請嗣後道員食俸俱照四品支給應如所請再各省督撫均兼尙書侍郎銜其俸銀亦應照兼銜查兩江兩廣湖廣閩浙總督俱兼尙書銜而食俸仍照二品三品江蘇浙江廣東廣西湖北湖南巡撫俱兼侍郎銜而食俸仍照三品應請將各省兼尙書銜之總督均支食一品俸兼侍郎之巡撫均支食二品俸從東華續錄

之○乙巳申嚴生童冒籍例○調許松佑爲甘肅布政使以彰寶

爲湖南布政使額勒金爲貴州按察使

由甘肅臨洮道遷

○辛亥 上視

皇三子永璋疾○甲寅參贊大臣阿里衮奏臣於六月初六日

奉旨起程回京初七日自喀什噶爾行至葉爾羌之雅木扎爾本

日據駐防玉斯屯阿喇圖什城把總等報稱回人搶掠臺站人馬

牲隻圍困城堡又准提督董孟報稱伯克邁喇木往尋舊居之伯

什克勒木村莊並未在家隨派兵查緝於中途遇邁喇木所屬回

人七騎卽行拏解惟哈三和卓脫逃等語臣速回喀什噶爾據董

孟告稱聞商伯克邁喇木妄造阿睦爾撒納越庫庫納克嶺已取

阿克蘇之言希圖煽惑人心肆其搶掠臣卽派兵查拏行至伯什

克勒木附近已有賊眾千餘排列臣率兵八百餘名力戰賊始入

城堅守復以槍礮攻圍是夜四鼓聞城呼號乞命卽行招撫詢據

供稱邁喇木同三四人渡河潛逃隨追獲邁喇木所屬托克托默特瑪穆特索丕等知向牌租阿巴特一路逃走卽行尾追至克色勒河據居人云牌租阿巴特之阿奇木伯克呢雅斯聞邁喇木逃來遂與同行不知所往臣分途追捕務期擒獲此次陣亡得傷官兵及隨吐魯番公品級茂薩擊賊得傷之回人等續行查明具奏諭軍機大臣等阿里衮聞賊回搶掠臺站之信卽回喀什噶爾擊敗賊眾撫定回人豐安楊甯等擒賊通信此次雖非大爭戰可比但應機立辦甚屬可嘉阿里衮著交部議敘伊子拜唐阿豐盛額著授爲藍翎侍衛額敏和卓豐安楊甯茂薩亦著交部議敘色提巴爾第托克托和卓等酌量獎賞其力戰有功及陣亡得傷官兵俱著查明報部議敘卹卹尋奏邁喇木會同呢雅斯逃走隨追至薩林都尋蹤入布魯特卽派茂薩前追臣領兵將布魯特出入要

隘防守調楊甯等巡查堵截六月十八日巴雅爾等報稱追至和羅木魯克見賊眾方欲會食卽拏獲邁喇木呢雅斯將其家口屬人勦殺收獲馬騾軍器前來臣逐一審訊因呢雅斯聞多倫回人等傳說阿睦爾撒納之信告之邁喇木適值議派邁喇木輪班進京聞和什克伯克等戶口俱送京安插恐被留在內與呢雅斯商議行文搖惑人心而官兵來勦甚速隨糾集回人倉卒拒捕及攻潰潛逃投向呢雅斯呢雅斯又將所縛兵丁二十人殺害遂與同逃供認不諱見將邁喇木呢雅斯解京奏入得旨嘉獎授阿里衮子豐盛額三等侍衛倭盛額藍翎侍衛封茂薩公爵授巴雅爾副都統職銜○實授阿思哈江西巡撫○戊午 皇三子永璋薨○諭海明奏稱葉爾羌伯克等採玉呈獻揀選送京並請諭和闐伯克有獻美玉者賞給段匹等語朕命大臣等駐紮回城原以鎮撫

新疆綏徠初附至揀選玉石何關緊要舒赫德尙知此意著傳諭伊等嗣後除舊例照常貢玉外回人等有求售及來獻者酌給價值不可傳知回眾令其採辦至大臣等果能實心辦事自必優加恩遇若辦事平常雖購得美玉亦復何益伊等知此庶識事體之輕重矣○乙丑以朝銓爲盛京刑部侍郎

由給事中遷

八月戊寅命廣州將軍副都統每年輪閱外海水師○己卯諭獻歲恭逢 皇太后七旬萬壽擬於新春敬奉 安輿時巡南服俯

慰士民頌祝之忱並順道閱視徐州石隄及海甯塘工因降旨令該省地方官修整道路橋梁照例豫備今歲大江以南在在豐收惟夏間雨水稍多河湖盛長高寶興泰一帶低窪處所頗有漫溢前因河臣等先後摺奏特傳諭尹繼善查明下游被水之區豫籌撫綏復恐地方有司承辦南巡差務轉於賑恤事宜不能盡心經

理是以諭令該督將實在情形確查具奏候朕降旨酌緩巡幸今據奏到高寶等處被水較重該處既見已成災亟宜以賑務爲切要南巡一事原不妨酌量改期該督身任封疆自當權其緩急早爲奏請何必待朕詢及始行入告耶所有南巡應辦差務暫行停撤改於壬午春恭奉 慈輦以慰輿情仍可攬民風而昭盛典大差既經停止自可專心辦理賑務該督等務宜仰體朕懷董率僚屬確按災地情形實力妥辦勿使窮黎稍有失所以副朕痾瘝在抱之意○已丑 上奉 皇太后啓鑾秋獵木蘭○免經過地方本年額賦十分之三○壬辰以阿桂總理伊犁事務授爲都統○甲午吏部議准陝甘總督楊應琚奏赤金靖逆二衛經臣奏准改設爲玉門縣但查靖逆衛西至安西首邑淵泉縣交界僅五十里東至肅州交界二百四十里地勢偏於西隅未便將縣治駐紮赤

金衛西距靖逆一百里自靖逆至涇泉縣交界五十里東距惠回堡九十里自惠回堡至肅州交界五十里居中扼要請將玉門縣移駐赤金衛從之○丙申 上奉 皇太后駐蹕避暑山莊○定州縣起解錢糧撥兵護送例○戊戌 上奉 皇太后自避暑山莊巡幸木蘭行圍○己亥增設江甯布政使以江淮揚徐海通六府州分隸管轄蘇松常鎮泰五府州隸蘇州藩司轄安徽布政使移駐安慶專辦上江事務○調託庸爲江甯布政使許松佑爲安徽布政使由甘肅○命侍郎于敏中軍機處行走○辛丑以明德爲甘肅布政使調吳紹詩爲甘肅按察使以巴哈達爲雲南按察使由甘肅

豐道選

九月丙午御史吳綬詔奏雲南學政李中簡奏稱滇省文風淺陋童生應試四書文兩篇不能兼及詩篇經義請裁去書文一篇以東華續錄

一書一經一詩命題等語該學政所奏止就滇省而言未經槩行直省請嗣後各直省童生應試悉照該學政奏准格式以一書一經一詩命題試卷解部時照四書文一例磨勘下部議行○乙卯裁併山西歸化城七廳爲五廳改協理通判爲通判頒給關防○戊午吏部議准江蘇巡撫陳宏謀奏淮安府屬之清河縣逼近黃河向無城垣仗土隄爲保障前康熙年間曾有決口之事今年黃河水大一稜土隄寬僅數尺縣治終屬堪虞請移駐對岸之清江浦從之○丙寅定鄉會試磨勘官添用編修檢討例○己巳上奉 皇太后駐蹕避暑山莊○辛未參贊大臣阿桂等奏伊犁耕牧城守各事宜一增派回人屯田查伊犁收穫可敷屯田回人一千戶之食本年見有屯田回人三百名近經舒赫德增派五百名已照例整裝於來年春起程仍有應派回人二百名請俟伊犁麥

熟後遣發一增派官兵駐防屯田查伊犁收穫通來年增派回人
五百名計之可敷官兵二千五百人之食見有駐防滿洲索倫察
哈爾兵八百餘名應增兵六百餘名屯田綠旗兵一百名應增九
百名以上增兵一千五百名應陸續遣發一增派官兵請隨時酌
量定數查屯田回人一千計其收穫則壬午年卽敷官兵三千人
之食加以綠旗兵一千則所收又倍應酌量定額以多駐馬兵於
邊防有益如駐兵五千則馬三步二駐兵四千則減步兵一千一
次第建置城邑查伊犁要地河北則固勒扎河南則海努克其地
土肥饒之處則察罕烏蘇應於海努克築城以回人三百名屯田
用兵數百名駐防西通哈薩克布魯特及回地諸路察罕烏蘇築
城以綠旗兵一千名屯田並駐防伊犁河北一路固勒扎須築大
城凡駐紮大臣公署倉庫咸在以爲總匯其馬兵於草青時分路

巡查霜降後各同汛地擬於壬午年夏季派綠旗兵一千名辦理
令回人協助一年內竣事一豫備屯田兵馬駝見議增派綠旗屯
田兵一千必需馬匹查烏嚕木齊所易哈薩克馬六百匹尙不敷
用應將陸續市易之馬令安泰等辦理千餘匹及查明哈密巴里
坤有無馬匹應用其行裝駝隻查烏嚕木齊尙有七百應揀選五
百解送卽於伊犁牧放從容往來轉運得旨軍機大臣議奏尋議
伊犁屯田原屬次第辦理除覓在回人三百名外舒赫德又派回
人五百名於來春起程其續派之二百名仍令酌量若能一起前
往甚善如不能則竟於秋收後發往庶回人不致竭蹶而伊犁糧
石亦可節省至本年所收糧石旣足官兵一千人之食則來年增
墾可以類推應如阿桂所奏此項官兵於春秋二季分起調往其
官兵額數酌以四五千爲率但必隨時出派始不煩內地之力

應俟來年秋收後再行酌定其駐防年限照從前成議更換又所奏建置城邑實為邊防長久不獨地當衝要亦宜相其形勢物產查固勒扎地居曠野薪炭無資應於烏哈爾里克察罕烏蘇哈什崆吉斯伯勒齊爾等木植多處或近山產煤之地築城駐兵仍令阿桂等再行勘定其海努克察罕烏蘇二城俱應如所奏辦理但另派綠旗兵一千築城未免張大其事且多浮費應令屯田綠旗兵於農隙次第興築不必定以年限又所奏屯田馬駝查所易哈薩克馬匹見議陸續解送烏嚕木齊有駝七百隻即可選出五百俾運送一千人屯田器具至兵丁糧餉春初照初次遣兵例從阿克蘇辦給米麪羊隻麥熟後則但給以程途口糧並請嗣後添駐官兵總於烏嚕木齊阿克蘇調撥從之

冬十月丙子蘇崇阿緣事革職調彰寶為蘇州布政使以永泰為

湖南布政使鄧錫禮爲四川按察使○丁丑 仁宗皇帝生 上

之第十五子也 母曰魏佳氏○戊寅調熊學鵬爲刑部侍郎謝

溶生爲兵部侍郎○壬午調宋邦綏爲山西布政使以史奕昂爲

廣東布政使富明安爲福建按察使

由廣西蒼梧道遷

○乙酉 上奉

皇太后自避暑山莊回鑾○丁亥增建順天大興縣常平倉於黃

村宛平縣常平倉於拱極城○庚寅以亢保爲湖北布政使石禮

嘉爲江西按察使

由湖北驛鹽道遷

○辛卯 上奉

皇太后還京師○

乙未江西學政謝溶生參奏巡撫阿思哈納賄勒派各款命劉統

勳常鈞會同尹繼善往鞫○丁酉命直省保舉堪勝知府人員○

己亥賞原任吏部尙書汪由敦之次子承需廕生授額外主事三

子承濤賞給舉人

十一月辛丑朔賜馬全等五十三人武進士及第出身有差○壬

寅定八旗巡倉兵丁按日輪派例○癸卯諭軍機大臣等舒赫德奏阿克蘇等城出產紅銅見據該伯克等懇請設鑪鑄錢流通行使並乞照葉爾羌之例範爲阿克蘇字樣至工役器具皆所必需業經行文該督辦送器具其工役等若於葉爾羌分撥恐彼此俱不敷用仍請於內地另行派撥等語錢文爲回民日用所必需自應照葉爾羌例一體鼓鑄著傳諭楊應琚卽查照上年之例速行妥辦派員送往○己未以定長爲兵部右侍郎由副都統銜遷○癸亥諭軍機大臣等楊應琚奏稱葉爾羌見在市價每銀一兩得錢一百二十文而回人交納錢糧則每兩七十文兵丁之領餉亦然及與回人交易則不能不照市價殊未盡一請照阿克蘇等城之例每錢一文作銀一分百文爲一貫凡官兵回人銀錢出入一律辦理等語回城設局鼓鑄錢文自應與內地之出入一律楊應琚此奏

或綠旗官兵等傳說太過亦未可定總之官兵回人俱不可有所偏徇阿克蘇既出入相同葉爾羌等處自應照例辦理著傳諭舒赫德新柱等公同酌議嗣後回人交納錢糧著以錢百文爲銀一兩儻伊等以爲交錢不便卽著交銀務使市有定價則公私皆獲其益並將原摺錄寄閱看○丙寅諭前謝溶生參奏阿思哈收受屬員餽送贓款累累朕意阿思哈向來尙屬謹慎之人未必果有其事是以遣劉統勳常鈞會同尹繼善前往查審今據奏到該撫因生女收司道金錫綾段一節證據已確其他各款亦有端緒是阿思哈收受餽送已屬顯然實爲可駭巡撫身任封疆正己率屬尙慮屬員巧爲嘗試乃收納苞苴先自大吏何以激吏治而飭官方且以阿思哈平日操守尙似可信而簠簋不飭一至於此在伊納賄敗檢自取重戾固不足惜而朕亦將何以用人耶阿思哈著

革職交劉統勳等逐款嚴審按律定擬具奏江西巡撫印務卽著
常鈞暫行署理○戊辰諭今日兵部帶領引見人員內其干總等
俱穿蟒袍此等微弁置辦不易嗣後文職自縣丞以下武職自千
總以下遇應服蟒袍之日俱不必定行穿著○是月陝甘總督楊
應琚奏甘省肅州地方界當邊塞地多荒曠自開闢新疆以來肅
地爲內外總匯見在商民輻輳查該州北鄉一帶荒土界在邊牆
以內者始則編戶畸零未及開墾遠在邊牆以外者又以地有禁
限未許越耕但際此拓疆萬里中外一統不必區區以遠邊爲限
請將肅州鄰邊荒土盡令開墾並爲相其流泉開渠引灌於軍需
平餘項下借支工需令承墾人戶分限繳還得旨甚好

十二月丙戌諭前因平定西陲版圖式擴朕本意欲於伊犁葉爾
羌等處皆置屯田令地方官管理因念陝甘總督所轄旣廣勢難

兼顧是以准議將陝甘總督改爲甘肅總督而陝西一省歸於川
督管轄然軍需之際恐隔省呼應不靈是以雖定有此制仍令照
舊統轄俟軍需辦完再降旨如新制今思新闢各處俱有大臣駐
紮無須更設道員則甘督無鞭長莫及之處莫若仍舊管轄著將
甘肅總督仍爲陝甘總督統轄二省其四川總督不必兼管陝西
○諭軍機大臣等據劉統勳等奏審擬阿思哈婪賄派累一案已
批該部覈議具奏矣其中勒派董榕買物一款供單所開董榕代
買物件與方觀承訊取伊家屬供詞覈對大槩相符阿思哈亦已
承認但約計諸物價值不下數千金今摺內止稱代辦紗葛及紫
檀木器俱照值發過價銀四百兩並無累其賠墊等語試思以數
千金而僅給四百兩其短發價值不問可知尙得謂並無累其賠
墊之事耶劉統勳等既未將短發價值之處詳悉覈究而於董榕

是否因派累而致虧空亦未查訊分明殊屬草率著傳諭劉統勳等將此款再行詳訊具奏尋奏阿思哈派董榕代買諸物據實查估委係短發價值虧空之故原由賠累而生並查贛關稅務收解之外亦不無漏卮得旨著該部覈議具奏○調胡寶琮爲江西巡撫吳達善爲河南巡撫以明德爲甘肅巡撫由布政使遷○戊子禮部議准福建考官周煌等奏閩省舊設同考官十二房乾隆十八年議裁易經一房見在易經三員書經二員詩經四員春秋禮記各一員但詩經卷多每房各分及千卷校閱未能裕如請以原裁易經一員撥入詩經內增爲五房從之○以吳紹詩爲甘肅布政使文綬爲甘肅按察使由安西道遷○己丑軍機大臣議覆回部厄魯特駐紮大臣事務繁雜每歲請各給養廉二千兩查西藏西南坐辦事務之大臣均歲給養廉銀三千兩未免過優請於駐紮西藏大

臣養廉內各減銀五百兩駐紮西南大臣養廉內各減銀一千五百兩歸入駐紮西路辦事養廉款內從之○封吐魯番伯克茂薩爲輔國公○壬辰刑部奏定擬阿思哈收受屬員餽送一案得旨阿思哈依擬應絞著監候秋後處決其餽送賀禮之司道大員不能正己率屬違例餽送自應照部議革職但該撫盤盤不飭致屬員有意逢迎罪在阿思哈一人湯聘亢保蔣衡高積俱著革職從寬留任原任饒九道黃爲兆著於補官日革職留任尹繼善著銷去加二級紀錄四次抵降二級免其降調○丙申諭昨據欽天監奏明年元日午時日月合璧五星聯珠並繪圖呈覽請宣付史館朕以七政同躔互運陵犯或時有靈臺占候者轉指爲瑞應以飾聽聞則大不是因召諸王大臣及監臣等面詢據勒爾森等稱五緯連貫相生不侵次舍實叶吉占並非以祲爲祥等語朕於天

文象緯素未深究從不强不知以爲知但思日月五星行有常度
史傳所載高陽氏時五星聚於營室年代荒遠已難具論卽如漢
高祖元年五星聚東井宋開寶元年五星聚奎殆千有餘年始一
遇而其爲實爲僞亦莫可究詰我朝雍正三年日月合璧五星聯
珠相距宋時亦已七八百年今自乙巳至辛巳章部甫及兩周何
以遂應再覲耶據監臣奏稱較前度爲尤昭明則安知將來不有
議此度之亦不昭明者耶邇日西陲大功底定版圖式廓遠逾二
萬餘里海宇宴安年穀順成內外諸臣大法小廉人民樂業其爲
祥瑞孰有大於此者乎又如今冬京師風日晴暖正在望雪之際
而六花疊降四野均霑直隸河南山東山西等省並陸續奏報得
雪而諸回城新闢耕屯亦有盈尺告豐之奏此則祥瑞之實而可
徵者固不在乎合璧聯珠始足以彰上蒼符應也在監臣等職司

觀象諒不敢妄相附會以爲潤色隆平之舉而揆之於理終難深信卽使懸象著明星文表異實爲我國家世運亨嘉之盛瑞惟當益加兢業保泰持盈用以上承 靈庥以與我天下臣民共享太平之福耳至謂元正嘉兆適逢 慈甯七旬大慶之年可徵 萬

壽延禧之祝朕惟心識之而默叩 乾睨若必宣付史館垂爲慶

牒則各省文武大吏必競以甘露慶雲等事紛紛入告將日事虛文轉致貽誤實政殊非朕敬 天勤民宵旰圖治之意所奏不必

行仍將此宣諭中外知之○以德敏爲荊州將軍永貴爲左都御

史調常鈞爲倉場侍郎

由刑部調

○命永貴往葉爾羌換舒赫德回京

○是歲朝鮮南掌來貢○會計天下民穀數各省通共大小男婦

一萬九千六百八十三萬七千九百七十七名口各省通共存倉

米穀三千一百九十七萬九千八百四十一石七斗四升七合九

勾零

東華續錄

乾隆五十三

臣王先謙敬編

臣周瀚蕃恭校

乾隆二十六年辛巳春正月壬寅紫光閣落成賜大學士公傅恆以下畫像諸功臣並文武大臣蒙古王公台吉等一百七人宴○命藏得勝靈簾及西師俘獲軍器於紫光閣○丁未諭今日劉藻奏到滇省屬員賢否清摺朕以愛必達亦已具奏爰檢取覈對見伊等所注屬員考語大略相同因復將伊等上次所奏兩相比較亦毫無參差之處殊屬可異三年大計之外別令各督撫密奏屬員賢否原欲其覈實別真以備簡用是以此等清摺朕皆留中時披覽亦不令在廷諸臣與知該督撫等自當各就所見據實入告初不必彼此會同以示意見畫一旦正惟不必畫一而朕於其

閒參互審量益可以得其人之真若必一督一撫毫無異同則與計典之會商論定者又何以異矣事密摺具奏乎卽調督撫辦事實乎和衷然衷不可不和而議見則不必盡合縱使人才不甚相遠此見爲優彼必不見爲劣而各出衡鑒分別品題豈竟無大同小異之處乃必依樣葫蘆若此試思此係兩人會奏之事抑係各人自奏之事如必瞻徇雷同隨聲附和則嚴覈人材密告君父之重典又將沿爲故套豈朕所以奇耳目心膂之意乎愛必達等兩次所奏屬員賢否何以一例相同著兩人明白回奏尋愛必達劉藻各陳平日議論屬員賢否意見尙無參差以致具奏相同實情請交部嚴加議處得旨該部嚴察議奏○以柏琨爲陝西按察使

由山西歸綏道遷

○乙卯賜哈薩克阿布賚阿布勒巴木比特敕諭曰爾

等使人卓勒巴喇斯等與侍衛納旺俱安善前來朕卽召見加恩

賞資錫宴特賜爾阿布資阿布勒巴木比特蟒錦段匹器什芽茶
各若干交使人齎回其各祇受並賜來使翎頂冠服段匹器什銀
兩有差至爾等所奏朕已鑒悉從前巴魯克巴圖爾搶掠烏梁海
等駐紮烏里雅蘇台將軍欲發兵問罪朕念爾等素稱恭順不允
所請特命侍衛納旺前往諭令拏送罪人查還所掠爾阿布資卽
同納旺親行查辦送還烏梁海人口牲隻什物又遣使入覲代巴
魯克巴圖爾請寬朕爲天下共主凡外藩歸附人等果能自知其
罪改過遷善亦姑予矜全惟怙終不悛始加征討今巴魯克巴圖
爾旣惶懼祈求而爾等又專使奏懇朕恩尙屬恭順巴魯克巴圖
爾著免其拏送治罪嗣後爾等惟加意約束所部各守封疆善圖
生計勿謂此次有請卽允遂妄圖僥倖越境盜竊斯時將軍大臣
等奏請發兵朕亦不能姑息從事必致擾爾遊牧於爾復有何益

爾當以朕意徧諭所屬俾知遵守再爾等使人拜克奈等轉回謬言愛呼斯地方已蒙大皇帝賞給哈薩克遊牧經伊犁大臣查詢具奏從前使人奏請在塔爾巴哈台遊牧朕卽諭以不應越境且載在敕書而爾等屬人仍造言生事若此是徼幸之心尙未止息已諭伊犁大臣等有哈薩克遊牧者卽行驅逐今卓勒巴喇斯等所奏又有南界綽爾郭西界沙喇伯勒中抵勒布西等語凡此數處皆厄魯特故地而爾使謂哈薩克俱有遊牧隱躍其辭希圖窺伺更屬僥倖試思我國家以大兵平定之地豈可任爾等侵踞况爾等前爲厄魯特所擾雖見在遊牧之處亦遠徙避去仍不能免於搶掠今干戈甫靜共樂昇平爾等遊牧並非狹小乃妄行陳奏朕必不允是徒有貪得見小之名僞妄生窺伺或轉至失其所有甚無謂也至爾等所奏哈薩克全部已爲臣僕願世世子孫永效

惓誠乞賜璽書爲勞等語朕嘉悅覽之爾等果能遵朕所頒教諭約束部眾各安生業自必永綏福祿垂於萬年矣又爾阿布賚使人奏云爾所屬有三人爲烏梁海所獲乞查出發回所奏未爲合理卽如巴魯克巴圖爾係獲罪之人理應挈送尙加恩寬免此三人旣爲烏梁海所縶養何必瑣瑣計較如必欲查還可將巴魯克巴圖爾挈送前來朕再降諭旨適已命爾使傳諭因附及之爾等各宜領悉○癸亥以傅森署左都御史官保爲刑部右侍郎

由副都統

遷

○甲子諭御史呂光亨奏請京員於察典之外照外省督撫分

別屬員賢否例令該堂官各行密陳一摺所奏自屬近理三年舉行京察在部院大臣自無不和衷商推詳慎甄別其是否允當亦俱在朕洞鑒之中惟是該司員等在署服官有目共見其賢否眾著者雖有私心愛憎斷不能不爲公論所屈若其意見參差又不

必強同令於循例考察外俾得各抒所見以備參考不獨可以校覈人材卽大臣之衡鑑公私瞭然可覩於闕門達聰之道不無裨益但摺內所稱每歲入告未免太煩應定於京察前一年舉行一次又部院官屬眾多主事筆帖式等以下尙在造就儲才之列可毋庸列入嗣後具摺密陳自郎中員外以上始著爲例其如何酌定章程該部悉心詳議具奏尋議各部院郎中員外以上俱令各堂官詳加察看填註切實考語分一二三等遵旨於京察前一年十月內具摺密奏不得會商附和至內閣侍讀員外一體較俸升轉雖秩止六品應由內閣具奏科道由都察院密奏宗人府副理事官以上由宗人府密奏編修檢討以上由掌院密奏贊善以上由詹事府密奏其坐補原部及在部辦事候補人員應一體列入使知懲勸盛京各部及內務府 陵寢等衙門凡有員外以

上等官者悉照此辦理再京察時到任未及半年者例不填註考語然既在署辦事賢否亦約略可見亦應於摺內聲明附奏堂官到任未及三月者准展限於本年十二月內補奏至府尹所屬之治中雖係五品然係應升員外之員無庸入奏從之○丁卯山東按察使沈廷芳奏會子及門十有二人子思而外子襄陽唐公明儀公明高孟儀檀子公孟子高樂正子春公明宣單居離沈猶行及本朝湯斌並請從祀 文廟得旨增祀之事議論紛如聚訟亦無實濟政要故不爲也○戊辰諭軍機大臣等昨據沈廷芳請增從祀 文廟一摺所奏無關緊要已於摺內批示訓飭矣身爲臬司自有職任應爲之事所當實力辦理者從祀增損本無裨於實政昔人紛紛聚訟已屬無謂乃摭拾經生家言連篇累幅徒爲條奏塞責可乎國家激勵人才見在信賞必罰應之者尙恐不能捷

如影響況以已往之人用虛名進退遽望其轉移風尚真所謂不揣其本而齊其末耳沈廷芳向來原有好名習氣觀此奏可見積習未除其平日居官究竟何如著傳諭阿爾泰令其據實奏聞如果任徒務虛文不知盡心職業該撫卽行參劾毋少迴護尋奏沈廷芳人本迂腐自以出身鴻博每拘牽文義喜尙虛文於政事未能實力殫心且有好名習氣兼時有疾病一切察吏明刑終難望其整飭得旨旣無大過或可姑容若實下愚不移秋閒再劾可也

二月壬申諭各處教習三年期滿引見並無一二等之分惟國子監有之此例徒足開士子捷徑於實政殊無裨益將謂一等者爲優則該監之列在二等者初不謂之劣而一則歸本班銓選一則留學以知縣卽用且留學三年旣以知縣卽用而又豫爲聲明遇

揀發時一體挑選是名爲學校收課士之效而實爲上下其手啓
速化之門耳於教學用人俱無實濟嗣後此例著停止毋復滋僥
倖其如何詳定章程之處該部定議具奏尋議嗣後國子監教習
三年期滿該堂官照各處教習之例出具切實考語帶領引見或
用知縣或用教職恭候 欽定毋庸分別等第並毋庸留學三年
其奉旨以知縣用者俱令歸班候選從之○癸酉 上臨大學士
蔣溥第視疾○諭前李侍堯題參陸川縣知縣應斯鳴等縱賊害
良一本朕以鄂寶身在粵西何以毫無聞見降旨令其明白回奏
今據鄂寶覆奏巡檢陸廷相受賄縱賊毫無證據語多迴護如果
原控情節屬虛則鄂寶先不當與李侍堯會銜題參且稱案犯見
在正須研審又何以遽將事主舉監徑行咨革前後辦理殊屬舛
謬鄂寶著交部嚴加議處此案令馮鈺就近前往查審定擬具奏

鄂寶尋降
三級調用

○召鄂寶來京以託庸爲廣西巡撫調彰寶爲江甯布

政使以安甯爲蘇州布政使

由蘇州
繼造遷

○甲戌

上御經筵○申夢

璽以徇庇屬員降調以曹繩柱爲廣西按察使

由河南南
汝光道遷

○庚辰

上奉

皇太后啓鑾調

泰陵並西巡五臺山○壬午免經過

地方本年額賦十分之三○甲申

上奉

皇太后謁

泰陵○

乙酉安南國王黎維禕卒嗣臣黎維禕禕遣使告哀貢方物○命翰

林院侍讀德保大理寺少卿顧汝修冊封故安南國王黎維禕姪

黎維禕爲安南國王並致祭故國王黎維禕○丁亥免直隸萬全

等八州縣八年至十八年逋賦○甲午 上奉 皇太后駐蹕五

臺山○乙未免山西五臺縣二十四年二十五年民借倉穀石樓

等州縣逋賦○戊戌

上奉

皇太后回鑾○是月雲貴總督愛

必達奏安南國沙匪郡尋卽滾尋越入內地滋擾前經移咨該國

王迅飭興化鎮目丁文坦督兵圍擊飭開化等府文武員弁親至
壩邊邊界巡查堵禦賊城堅厚又築水城周圍空濠經丁文坦攻
毀水城會議攻破卡道即可進偏賊巢報聞

三月壬寅禮部議覆大學士蔣溥奏請定考試中書之例一摺查
考取中書閱字與閱文並重既係本人書寫不無迹涉嫌疑今據
奏稱於會試薦卷中挑取事屬可行但考官所校僅在文義似未
可以場中所取之數槩行授官應請不拘省分以四十名爲額再
備取二十名隨同新進士引見恭候 欽定再中書若專用舉人
遇會試之年恐俱願入闈應試辦事必至乏人應於新進士引見
時請酌用數員與舉人中書一體補用從之○乙巳 上幸正定
府閱兵○丙午知貢舉刑部右侍郎熊學鵬奏查會試及順天鄉
試例應將擬中前十名元魁卷豫期另謄進呈請自本年會試爲

始所有擬中元魁十名卽將硃卷封固進呈其向外簾取謄錄生
進內另謄之例應停得旨所奏甚是如所請行著爲例○戊申諭
江南河道總督白鍾山熟諳河務宣力有年前以老病懇請解任
曾經降旨俾其在任調攝今聞溘逝深爲軫惜著加贈太子太保
所有應得卹典著該部察例具奏尋予祭葬諡莊恪○以高晉爲
江南河道總督調託庸爲安徽巡撫以熊學鵬爲廣西巡撫由刑部
議侍
○庚戌吏部議御史睦朝棟請將今科會試迴避舉子另行考
試有心要譽甚乖職守應照溺職例革職得旨吏部察議睦朝棟
照溺職例革職一本所以留中不發者朕意以爲若總裁大員中
查無應行迴避之人則該御史所奏不過博一時虛譽其罪尙屬
可原今據知貢舉熊學鵬查奏應行迴避士子則有總裁劉統勳
之胞弟胞姪二人于敏中之堂姪一人劉統勳于敏中旣係軍機

大臣而睦朝棟見係軍機處行走之員此次劉統勳于敏中二人
不令隨駕外閒已揣其與典試事而軍機處之人固不待言矣况
朕向劉統勳等曾面諭及之睦朝棟豈有不知之理則其所奏顯
屬迎合上官此風斷不可長前明師生堂屬黨援門戶之弊往往
假公濟私害及朝政最爲言路惡習我 皇考十三年以來大加
整頓風紀肅清朕臨御二十有六年於臺垣章疏苟有一二可採
者未嘗不見之施行若其意有所屬瞻顧徇私者亦斷難逃洞鑒
睦朝棟何人而敢以此等伎倆巧爲嘗試乎此在諸科道尙屬不
可况該御史之在軍機行走者乎今歲恩科會試已屬格外曠典
臣工得與文衡已可云寵榮逾分而更欲爲宗戚侍中是於不知
足之中又加甚焉號稱讀書者宜如是乎此於政體官方士習均
有關繫睦朝棟革職不足蔽其辜著交刑部治罪劉統勳于敏

中之授意與否姑不深究然致屬員之如此假言獻媚則二人亦不得謂無咎其劉統勳于敏中之弟姪應行迴避者槩著罰停鄉會試一次以示儆戒○壬子 上幸平陽浚行國○禮部議覆御史范梈士奏稱國子監學正學錄向由考取記名今內閣中書既議於會試薦卷中挑取應請一例辦理於取錄中書額數量爲寬取數名不必豫定款項統俟引見錄用等語查取錄中書名數議准六十名其年力老成宜於課士者請於引見時量用數員交部以學正學錄選用無容另定取額嗣後國子監需人先期咨部辦理從之○甲寅諭軍機大臣等海明奏稱查出布拉呢敦離異之妻愛什阿哈察所生子薩木薩克將伊乳母及收養之回人博羅特索不解京等語薩木薩克尙屬童稚不應緣坐送來京師惟加恩養育可耳卽博羅特索不留養舊主之子情亦可矜俱著照例

安插但聞布拉呢敦尙有二子或藏匿回地亦未可定著傳諭永貴等以留養薩木薩克一事曉示回眾仍留心訪察其餘子嗣毋任藏匿○調錢維城爲刑部侍郎以范時紀爲工部侍郎由副都統遷○丙辰 上奉 皇太后還京師○丁卯改綏遠城建威將軍曰綏遠城將軍○以喬光烈爲河南布政使趙孫英爲直隸按察使由山西冀甯道遷○己巳南寧國王蘇嗎喇薩提拉准第駕公滿遣使表賀 皇太后聖壽 皇上萬壽並貢方物賜 御書扁額賞賚有加

夏四月庚午朔 上幸莊親王允祿第○幸大學士蔣溥第視疾

○辛未鄧錫禮緣事解任以蔡長湮爲四川按察使由江南興豐道遷○

壬申諭薩喇善係獲罪之人派往伊犁效力贖罪理宜作速起程

乃以患病生瘡不能前往伊子恆璜具呈請代此特沾名之舉耳

漢人中有似此者朕曾降旨訓飭恆瑣身屬滿洲且係宗室豈宜
出此乃軍機大臣並不斥駁竟爾據呈轉奏如出於無心尚可若
以薩喇善係傅恆姊夫瞻徇情面乃爲代奏則更非矣卽如傅恆
朕亦因其平日謹慎奮勉是以格外優待否則朕恩豈可長恃乎
軍機大臣此奏愛之適以害之耳此等情節豈能逃朕洞鑒再此
事若在他入患病不能前往朕或施恩寬免至薩喇善則斷難寬
貸薩喇善著仍發往伊子恆瑣著革去侍衛隨伊父前往○癸酉
四川總督開泰等奏金川土司卽卡裏稱我本 天朝土司爲與
眾土司不和眾土司因將不法之事向內地官府前控告如今止
求作主剖斷情願恪遵絲毫不敢多事等語臣等思金川與革布
什咱構釁以致各土司圍堵兩載有餘卽卡既不能獲逞其吞併之
謀且數經挫衄稟求剖斷若仍令各土司駐防攻守旣不能剋日

奏功轉恐日久生懈隨委諸練員弁前赴綽斯甲布黨壩金川一帶會同各土司所遣大頭人宣揚恩德切指卽卡罪惡明白剖斷將金川在黨壩界上所修碉卡押令拆毀侵佔黨壩山地全數退還並差弁員前赴布拉克底令將金川所助番兵悉回巢穴然後傳知各土司將各處土兵及土練次第撤收惟是革布什咱兩被金川蹂躪殘破良多而巴旺毗連布拉克底人少力單仍留弁兵千餘名在革布什咱巴旺中間章谷地方駐紮以爲聲援昨綽斯甲布黨壩革布什咱巴旺小金川沃克什校磨卓克采從噶克九土司以土兵均撤陸續遣人赴省請安臣等諭以卽卡爲人狡詭目下雖已竣事仍當時刻留心不可墮其詭計卽卡亦遣人來臣等嚴行教誡諭以天朝之於土司正如雨露之於草木無有二致自己向順卽享安全自己作孽卽受災禍惟卽卡自擇之頭人又

稱上年莎羅奔已死即卡懇求換給印信臣等復諭以即卡止見有罪未見有功即使分當承襲亦應照例取具各土司印結由地方官詳報請題方能換給印信頭人又稱即卡因莎羅奔之死欲遣人赴藏熬茶求給路票臣等復諭以熬茶本係善事即卡應遣大頭人虔誠豫備將隨去人數若干報知該管地方官轉稟覈辦該頭人俱領諾而去報聞○己卯諭大學士蔣溥居心純正奉職恪勤簡任綸扉綜理農部兼領翰苑久直內廷敬慎小心從無少懈前因患病增劇屢賜醫藥朕親臨看視尙冀就痊遽聞溘逝深爲軫悼著加贈太子太保入祀賢良祠並賞銀二千兩治辦喪事朕於十三日親往奠醴以示恩眷所有應得卹典仍著該部察例具奏尋予祭葬諡文恪○命瑪納斯等處屯田並設伊犁至烏魯木齊臺站○辛巳調富明安爲廣西按察使曹繩柱爲福建按察

使○壬午 上臨大學士蔣溥喪次賜奠○甲申諭廷試爲策士
鉅典上年因朱崧條陳議定章程引見前列十名親定甲第並先
期令讀卷官會集文華殿悉心校閱其制已爲周備惟是增派王
公大臣及御史等監試一節在讀卷諸臣有事讀卷而從而監之
者終日坐視此不過防其爭執把持耳然各人意見時有不同勢
難禁其折中商推亦無取其同聲附和也若云把持獨斷則今日
尙覺鮮有其事卽果有之亦非監試數人所能察諸事朕惟務實
有名無實不如不爲自後王公大臣御史均毋庸如朱崧所云增
派因思諸臣讀卷向俱各加圈點分別標識其閒卽各有參差不
過如上之適中中之適下品題不無互見當不至相去懸絕其或
相去懸絕者必各具成見恐有高下其手之弊應自本科爲始俟
臚傳事竣禮部卽將讀過試卷請旨另派大臣覆行察看如有標

識懸絕者卽行指明進呈候旨庶諸臣不敢稍以私意抑揚鑑別益昭公愼又讀卷官所進策目問條向有由內閣豫擬之陋例漏洩揣摩不可不防其弊應一槩禁止屆期令讀卷官密擬策問進呈候朕裁定發齋刊刻著爲令○諭西路效力贖罪大員賞給一半養廉著爲例○丁亥吏部議准陝甘總督楊應琚奏前議裁大通衛歸德所之衛備查大通在西甯府治西北東西二百七十餘里南北四百三十餘里幅員甚廣衛備旣裁距各屬州縣並皆爲遠應將距西甯寫遠之北川新添堡等處十八村莊撥歸大通管理改爲縣治至歸德所距西甯三百餘里請改設西甯縣丞分駐該處從之○庚寅 上閱健銳營兵○壬辰李元亮因病解任以李侍堯爲戶部尚書調蘇昌爲兩廣總督愛必達爲湖廣總督以吳達善爲雲貴總督常鈞爲河南巡撫溫福爲倉場侍郎

由內閣學士選

○甲午賜王杰等二百一十七人進士及第出身有差○以雙慶

爲內閣學士

原任倉場侍郎

五月庚子諭向來直省秋審成例相沿巡撫率同司道赴按察使衙門會同查審雖一切豫備陋規久經斥禁然以巡撫率屬並會司署隨帶員役究不無供應之煩非所以慎刑章而清吏治今常鈞奏明本年安省秋審見在會赴撫署辦理所見甚是嗣後各省均照此例行著爲令○丁未命劉統勳爲東閣大學士兼禮部尚書以梁詩正爲吏部尚書協辦大學士劉綸爲兵部尚書金德瑛爲左都御史

由禮部左侍郎遷

○戊申以安泰爲刑部侍郎○戊午諭前

據楊廷璋吳士功會審馬龍圖私用存營公項銀兩一案輒引自首例減等定擬悖謬乖張迥出情理之外朕卽知此案立意必先出自吳士功而楊廷璋從而附和因降旨令伊二人公同明白回

奏今奏到定案時雖係楊廷璋主稟而督參撫審吳士功實爲主政往來商推具有原札可覈果不出朕所料吳士功身爲巡撫以提督大員營私舞弊此何等重案乃敢妄逞伎倆欲從中高下其手且明目張膽翼於朕前直售其欺居心尙可問乎卽據札內所稱幕友據引例文云云欲楊廷璋酌定之處尤堪駭異楊廷璋吳士功爲封疆大臣卽馬龍圖亦提督大員豈有二人胸中竟無定見悉藉幕友主張此語豈可覲顏告之同官奏之君父者其曲意幹旋不問可知况原審內有事前彌補之說朕覈參將姚應夢供內該犯定媳送聘借銀五百兩曾於養廉項下扣清此項銀兩於未經參奏之前豫爲彌補尙可自稱事前至買辦燕窩等銀一千餘兩俱係盤查時攢湊抵項且扯燒數簿以私冊掩飾其爲事敗假捏更何待言如此而猶欲以自首脫罪有此理乎朕臨御二十

六年歷事不少人之情爲素所洞悉吳士功本係張廷玉用人其生平貌爲直齟而城府甚深亦眾所共曉第以其人尙小有才且歷外任年久巡撫缺出一時不得其人因而擢用乃伊一得志又以閩省去京稍遠卽肆無忌憚卽如伊向因與張廷玉甚厚未免有得罪史貽直之處今又與史奕昂修好以冀解前恨則其人之居心邪正從可知矣朕本欲爲之隱惡揚善而伊乃敢顯爲攬權嘗試之計此而付之不問朕又將何以用人昨胡寶琮於河南任內道員等收受鹽規漫無覺察具摺自請治罪朕以其實出無心卽爲姑宥若吳士功之有心欺謾情甚可惡者其相去又可以道里計乎吳士功著革職發往巴里坤自備資斧效力贖罪楊廷璋身爲總督隨聲附和咎固難辭但究係爲吳士功所賣尙非發謀可比著革職從寬留任八年無過始准開復馬龍圖著鞫解來京

交三法司嚴審定擬餘著三法司嚴議具奏並將該督等前後奏摺及批諭廷寄一併鈔發將朕辦理庶政輕重大小不容纖毫蒙混並大臣等公罪私罪一切聽其自取亦不能纖毫假借之故俾中外臣工共知所懲勸○以定長爲福建巡撫永甯爲兵部侍郎

○辛酉調謝溶生爲禮部左侍郎以張映辰爲兵部右侍郎

由內閣學士

○甲子諭戶部尙書李元亮老成勤慎宣力有年前因患病特

予解任調理遣御醫診治並令伊子李侍堯卽速來京省視以冀痊可今聞溘逝深爲軫惜著加恩賞銀一千兩辦理喪事派散秩大臣一員帶領侍衛十員往奠茶酒所有應得卹典該部察例具奏尋予祭葬贈太子太保入祀賢良祠諡勤恪○丁卯參贊大臣舒赫德奏臣等風聞布拉呢敦逃入巴達克山時曾將幼子三人攜往今據素勒坦和卓贖回之葉爾羌回人台里布和卓密告臣

額敏和卓云布拉呢敦三子一名和卓阿什木一名阿布都哈里克一名和卓巴哈敦見在巴達克山居住所有照管養育之人俱甚窮苦且慮傷害臣等詳議若向素勒坦沙索取恐伊藉端居奇正在籌議間適奉到養育薩木薩克之恩旨臣額敏和卓卽密傳合里布和卓詢得實情隨飭親信屬人什丕同葉爾羌伯德爾格回人數名前往因貿易之便通知養育布拉呢敦三子之回人等宣示 聖恩令其帶領來投再經過霍罕部落之要隘亦行文該

處阿哈拉克齊密爾莽蘇爾令其照管前來一切俱以臣額敏和卓之意爲詞其合里布和卓等俱酌加獎許令其相機辦理報聞

六月丙子以觀音保爲貴州按察使由河南開歸陳許道遷 ○庚辰以周煌

爲內閣學士

由翰林院侍講學士遷

○癸未予故刑部左侍郎伊祿順祭葬

○丙戌諭前因各省藩臬於地方政務陳奏寥寥曾經降旨通飭

而近來具摺言事者自雨雪情形外亦不過掇拾條例內一二無關輕重之文虛應故事迨下部議覆則其事之可行與否彼又若不與其責者然豈朕重官常飭吏治之義卽如福建按察使富明安來京陛見朕詢以馬龍圖一案據稱彼時原知減等定罪之非且曾稟明督撫因楊廷璋商之吳士功遂有幕友查例之說曾不思臬司職任刑名當日旣見如此果能力爲揀止吳士功等皆可免於罪譴所全固多或堅持不聽亦應據實奏聞俾讞典得無撓枉其與尋常條奏塞責者相去何啻霄壤乃臨事委蛇旣內懾上官之勢又外博長厚之名及至朕前復借此爲自明諉過之地國家又安用此藩臬爲耶且今日之兩司卽將來之督撫設皆如此居心無論其身任封疆不足以資倚任卽此時見臬方面品秩不爲不優於督撫公事並非不應參與者何得俯仰趑趄視同隔膜

朕撫御臣工從無偏任伊等共襄職業亦豈肯教之苟立異同使
爲藩臬者有意取巧或藉越俎陳言冀得行其傾陷是徒自取罪
戾安能制人若不以官守爲重而惟以緘默爲善藏以模稜爲得
計其爲阿附督撫則一耳曠官廢事莫此爲甚儻將來竟相沿成
習設遇關繫重案辦理乖張同僚不知共濟將督撫獲罪朕亦不
能置兩司於不問也直省藩臬兩司著通行申飭並將此傳諭中
外知之○乙未弛貴州民苗結婚禁

東華續錄

臣周倫蕃恭校

秋七月辛丑以兆惠協辦大學士調舒赫德爲刑部尙書以阿桂爲工部尙書○壬寅諭軍機大臣等見在樂器需用特磐按十二律大小爲差江南靈璧縣素產磬石著交與高晉託庸遵照發去畫樣十二紙並寬厚尺寸件數如式採取石料每塊四邊俱寬留一分以敷琢造並令該督等選擇石質純淨無訛爛疵綮者依式照數妥辦務於九月初一以後十五以前解到交樂部承辦方可無誤冬至應用之期可將此傳諭該督等令其速行趕辦毋得延緩如其不能全得先將黃鐘律四塊解來其餘以次辦送此關大典卽用正項辦造亦可毋得累民○丁未協辦大學士刑部尙書

鄂彌達卒遺疏聞得旨鄂彌達敷歷中外宣力有年今聞溘逝朕心深爲軫惜著加恩賞銀二千兩辦理喪事仍派散秩大臣一員帶領侍衛十員往奠茶酒所有應得卹典該部察例具奏尋予祭葬諡文恭○己酉以納世通爲工部右侍郎○壬子命減緩決三次以上人犯罪○癸丑上啓鑾秋獮木蘭以雨命誠親王允祕恭扈皇太后駕俟晴日啓鑾○免經過地方本年額賦十分之三○丙辰諭軍機大臣等新柱奏謙珠特伯克黑斯裏遣伊子貢金隨酌量賞給又據告稱伯克訥格爾吉勒梯亦願附進土物等語外藩小部落輸誠入貢固不當較其貢物之厚薄但必親身前來或遣其子弟始足以昭忱悃若僅遣使人卽當酌量辦理至訥格爾等與黑斯裏一體乃懇其代進將來行之日久便成黑斯裏之屬人矣此風斷不可長嗣後若有免人附進者非但不加賞賚

亦不收受著傳諭新柱等知之○戊午大學士禮部議覆總理樂部莊親王允祿等奏金石爲八音綱紀故笙鏞擊拊著美虞廷雅頌所傳虞業特備自漢以來各史樂志俱載有鐃鐘特磬惟明代樂懸未興嘉靖時太常卿張鵬建言請設特鐘特磬因黃鐘律度未得不果我朝中和韶樂契合元音前者得西江古鐃鐘考定黃鐘真度上下損益更鑄爲鐃鐘十二竊以條理宜備始終請倣周禮磬氏句博股鼓依律長短之法制特磬十二處與鐃鐘俱爲特懸以備中和之盛其樂懸位次奏樂儀節考古制鐃鐘在東居編鐘之左特磬在西居編磬之右皆北向凡樂作起祝鐃鐘一鳴編鐘繼之樂闋擊特磬一乃奏敵凡大祭祀大典禮悉依應月之律各設鐃鐘特磬一處等語按周禮鐘師掌金奏鄭康成曰金謂鐘及鐃賈公彥曰此擊不編之鐘也磬師掌教擊磬劉敞曰宮懸有

特磬十二陳暘曰磬與鐘相待以爲用國語金石以動之是也磬有編有不編者明堂位叔之離磬虞書鳴球皆特懸之磬也爾雅大磬謂之磬大戴禮磬一懸而堂特則明有特磬也惟鑄鐘大小之制及賈疏磬無不編之說辨論紛紛朱子云鐘磬有特懸者有編懸者其特懸者器大而聲宏雜奏於八音之間絲竹皆爲所掩故但於起調畢曲時擊之以爲作止之節其論與孟子始終條理之旨相合則特磬與鑄鐘固均重已應倣周禮磬氏句搏股鼓依律制特磬十二處以僊鑄鐘至樂懸位次奏樂儀節見今樂部編鐘編磬久列東西特懸應各從其器其北向之處考儀禮大射樂懸之法編鐘編磬之外又有所謂其南鑄者鑄卽鑄也是特懸鐘磬東西定位北向自古而然其所稱大祀大典設應月本律之鑄鐘特磬各一考宋仁宗時詔定大樂馮元錡言鑄鐘考擊之法十

二鐘依辰列位隨均爲節以便合樂其說最允今奏樂依應月之律洵合古制從之 御製鑄鐘銘曰自古在昔功成作樂辨物得吉鑄此鐘鐃 皇祖正音中和大備詎獨是遺或存深意積底西旅瑞出西江考象制器協和萬邦一虞特懸用起律首編鐘繼奏簫韶成九寬橫樂舞必考必精慎遵 前憲敢或損增宣陽導陰立均出度萬事本根百王契屢繫予小子蒙業重熙賴 天耆定惟日際時範器識年悉新已盛銘無溢辭惕乾懋敬特鑄銘曰子輿有言金聲玉振一虞無雙九成遞進準今酌古既製鐃鐘磬不可闕條理始終和闐我疆玉山是藎依度採取以命磬叔審音協律咸備中和泗濱同拊其質則過圖經所傳浮嶽涇水誰誠見之鳴球允此法天則地股二鼓三依我釋如獻舞鸞鑿考樂惟時

乾禧 祖德翼翼繩承撫是萬國益懷保泰敢或伐功敬識歲吉

辛巳乾隆○己未軍機大臣等議覆參贊大臣舒赫德奏阿克蘇等處鼓鑄之錢宜派給回人行使錢法始可流通請將鑄得之七千餘騰格以四分存公六分派給回人來春收回人租稅以錢折價於十分內抽回二分續鑄亦照此辦理應如所奏從之○庚申皇太后啓鑾○壬戌上駐蹕避暑山莊○癸亥以安西種豆成熟命額徵糧改徵豌豆○甲子諭三寶著以道銜前往哈密辦事其直隸布政使員缺著觀音保補授同德在巴里坤辦事已經數載於採買羊隻等事俱辦理妥協著補授貴州按察使永甯著以侍郎銜前往巴里坤辦事同德俟交代後再行來京○丙寅上詣廣仁嶺恭迎皇太后鑾輿駐蹕避暑山莊○河南祥符等州縣河溢命侍郎裘曰修馳往查勘撫恤並籌堵濬
八月己巳諭昨據常鈞奏豫省祥符黑堤口等處河水漫溢已命

奏曰修前往會同辦理今據奏報見在漫水漸就消退地方城郭
可以無虞雖因奏稍慰但河溜奪出楊橋直趨尉氏縣買畝河舊
流淤淺斯於河防最關緊要着大學士劉統勳協辦大學士公兆
惠星速馳驛赴豫督率查辦○以河南祥符等縣被水命劉統勳
等會同常鈞嚴飭地方官隨查隨賑毋俟彙齊冊報展轉稽延○
調南河官弁赴河南工次協助堵築○甲戌命截留河南山東漕
運 陵糴粟米於直隸備賑○戊寅諭前蘇昌密奏周琬情性乖
張奏事倒提月日掩飾已過一摺朕以其事無實蹟或係蓄撫憲
見不合尙未遽信令愛必達於到楚後留心體察據實查奏今奏
稱周琬遇事偏執與蘇昌有意掣肘於地方要務及保題委署等
事係蘇昌曾經酌定者必欲反其所爲以致司道等恐致遲誤詭
以並未稟過督臣爲詞其接見屬員如意所私喜者則竟日閒談

而實有公事急須面稟之員或屢日不得一見又如今歲天門潰
江沔陽等各州縣五六月閒因雨水被潦例應於夏災案內奏報
而周琬竟以爲每年常有之事匿不上聞於歸州知州趙泰交誼
竊爲盜宜昌府知府佛保住酷刑妄斷一案則意存曲庇種種行
爲乖謬等語周琬由刑部司員因其尙有才具愿加簡擢用至巡
撫理應感激奮勉乃竟於地方政務不能和衷共濟任意妄行而
徇庇劣員玩視民瘼尤爲深負委任周琬著革職發往巴里坤令
其自備資斧效力贖罪蘇昌愛必達摺並發湖北巡撫員缺著湯
聘補授河南見有堵築隄工及經理賑恤之事胡寶琮撫豫日久
一切情形均所熟諳著仍補河南巡撫其江西巡撫員缺卽著常
鈞調補胡寶琮速赴新任侯胡寶琮到豫常鈞再往江西此時巡
撫印務湯聘暫行署理俟常鈞到日再赴湖北之任湖北巡撫印

務著愛必達暫行兼管○軍機大臣等議覆左都御史永貴奏回
部蕩平所設阿奇木等伯克請照各邊省土司之例給與印記等
語查回部葉爾羌等城辦事大臣俱已鑄給印信其阿奇木等伯
克自應一律鑄給圖記但圖記式樣宜加酌定以別等威查回部
設立阿奇木共三十一城計其大小酌爲三等葉爾羌喀什噶爾
阿克蘇和闐爲四大城烏什英吉沙爾庫車闐展爲四中城沙雅
爾賽哩木拜庫爾勒玉古爾牌租阿巴特塔什巴里克哈喇哈什
克勒底雅玉隴哈什齊爾拉塔克阿斯騰阿喇圖什阿喇古玉斯
騰阿喇圖什英額奇盤巴爾楚克沙爾呼勒魯克察克托克三喀
喇和卓洋赫克勒品爲二十三小城俱給與阿奇木伯克圖記其
大城圖記分寸視內地佐領中小等城以次遞減從之○庚辰命
江南河道總督高晉赴河南協辦河工○辛巳命停運河南本年

漕糧○以雷明安爲江西布政使調柏琨爲廣西按察使同德爲

陝西按察使趙孫英爲貴州按察使王檢爲直隸按察使以程灝

爲安徽按察使

由江蘇
監道遷

○調亢保爲貴州布政使徐垣爲湖北

布政使○庚寅撥山西倉米十萬石於河南備用○辛卯 上奉

皇太后自避暑山莊巡幸木蘭行圍○癸巳郭貴人薨追冊爲

嬪○甲午命撥倉米二十萬石於直隸備賑

九月壬寅以溫敏爲左副都御史

由通政
使遷

○甲辰以張逢堯爲雲

南按察使

由浙江
監道遷

○丙午諭昨江西學政謝溶生奏到泰和縣

逆犯李雍和潛遞逆詞狂悖不法一摺朕以悖逆大惡學臣一有

見聞原應據實入告但事關地方重案卽當與撫臣會審合奏該

學政乃據爲己有輒由驛五百里馳奏見小乖方不協事理已令

軍機大臣傳旨申飭將本案交署撫湯聘嚴審定擬具奏今據湯

聘摺奏則不但謝溶生具摺之前並不知會撫臣且湯聘既聞知府等稟報卽會同臬司親提審訊而謝溶生將該犯接出逆詞始終祕而不發其情尤不可解學臣職司課士使遇地方重大公事皆如此有心掣肘讞案何由而定向以謝溶生不過好事自用不達大體之人今觀其居心行事任私謬戾若此其於官方政體均有關係又豈獨急欲見長不能和衷集事已耶謝溶生著交部議處尋議應照例降三級調用有加一級應銷去加一級仍降二級調用得旨謝溶生著銷去加一級仍降二級調用○戊午諭軍機大臣等胡寶琮奏原任刑部主事余騰蛟詩辭狂悖請旨卽行正法一摺朕初閱摺內所敘事屬大逆已批三法司覈擬及檢閱詩文各稟卽原首及籤出各條率多蹈襲舊人惡調語句踏駁不得謂之誹謗悖逆胡寶琮或有鑒於從前胡中藻之案以爲既經首

出不得不嚴行處治且入告少遲又焉知不爲謝溶生先得居奇
是以如此具奏殊不知逆惡大罪國法不容胡中藻狂悖實蹟種
種朕不能爲之貸若此等詩辭豈可從一例論耶看來余騰蛟自
恃曾爲職官武斷鄉曲如余豹明所控幫助爭田等事實所不免
然此亦自有應得之罪若撫拾詩句吹毛求疵置之重辟不獨無
以服其心卽凡爲詩者勢必至不敢措一語矣朕明慎用刑一切
扞網之徒輕重惟其自取從來不設成見況摺內旣稱余豹明素
屬健訟儻將余騰蛟竟行嚴辦刁陷之風又可長乎胡寶琮見已
到豫著將此案交與常鈞令其詳悉研審將余騰蛟所有居鄉恃
符爭訟各本罪按律定擬具奏原摺鈔寄閱看並傳諭胡寶琮知
之○庚申 上奉 皇太后駐蹕避暑山莊○癸亥諭軍機大臣
等劉統勳等奏開放引河形勢已成勢甚通暢等因一摺辦理皆

中機宜已於摺內批諭看來此次劉統勳等所辦楊橋工程較之
從前張家馬路漫工竣事更爲迅速可見大工之集全在董理得
人則事半功倍非必帑費工多始堪奏效也昨者高晉摺奏南河
善後工程樂議增高培厚甚至估需銀四十餘萬非獨不知辦工
緩急次第且於事理全無體會必如高晉所奏因一處漫口全河
並須興作則見在自楊橋而下縣互數千里直至雲梯關入海其
將何所措手若以尋常修防動費帑金數十萬勢又安可爲繼與
其以此妄費於下游無事之處更何如用濟楊橋急工之爲得乎
想劉統勳等亦必聞其言而非笑之前寄尹繼善諭旨已極明悉
可一併鈔寄劉統勳等閱看令其面詢高晉伊將何以自解著於
奏事之便附摺奏聞○乙丑 上奉 皇太后回鑾○是月雲貴
總督吳達善等奏安南沙匪郡尋竄入內地焚劫村寨疊經該國

發兵協剿茲據該國具報九月初五日於清波地方將郡尋生擒當卽飭令解送內地審辦得旨是

冬十月戊辰以明春恭奉 皇太后聖駕南巡命截留江浙兩省

漕糧各十萬石於駐蹕地方平糶○辛未 上奉 皇太后還京

師○壬申命再撥倉米二十萬石於直隸備用○甲戌命山東截

留漕糧十萬石備用○丙子轉程景伊爲禮部左侍郎以何國宗

爲禮部右侍郎

由內閣學士遷

○己卯調五福爲工部右侍郎以彭啓豐

署吏部右侍郎俟服闋實授

原任兵部左侍郎

○辛巳葉爾羌辦事都統

新柱等奏辦理鼓鑄以錢五十文爲一騰格除兌給三城回人仍

存三萬六千餘騰格查回人兌支普爾錢文近將七十之數增加

三十頗累貧戶請嗣後以盡收普爾錢文爲止不必勒限報聞○

丙戌調蔣嘉年爲陝西按察使以梁肅鴻爲河南按察使

原任廣西按察

○丁亥諭成衮扎布奏車木楚克扎布等呈稱俄羅斯銓格爾圖喇瑪玉爾等奉伊吉納爾衙門來文將瑪哈沁色布騰等一百餘人及軍器馬匹等物全行送出等語車木楚克扎布等駐兵那林候俄羅斯信息曾經降旨訓飭今俄羅斯既行送出卽已竣事色布騰雖係俄羅斯違約呈獻非伊等擒獲但違道追捕亦與有勞績車木楚克扎布莽古賚著加恩賞段四端杜爾伯特貝勒巴桑烏梁海散秩大臣圖布慎領兵追捕喀爾喀協理台吉恭格向俄羅斯索取頗出力俱著賞段三端此次派出官兵及杜爾伯特烏梁海等官兵仍酌量賞賜以示鼓勵色布騰著嚴行押解來京○戊子諭軍機大臣等豫省堵築楊橋漫工已將就緒可以指日合龍見有劉統勳等在彼督率經理無需多人協辦高晉所管南河如高郵甘泉等曾被風暴之處見有應行相度辦理工程且

南巡在即差務亦應料理著傳諭高晉令其卽回南河總河任所
不必留駐豫省○辛卯以張若澄爲內閣學士由翰林院侍讀學士遷○壬
辰命裘曰修回京○癸巳命劉統勳兆惠回京○甲午以安泰爲
刑部侍郎○是月貴州巡撫周人駿奏黔省近年多種棉苧仁懷
廳等處兼放山蠶結繭數萬試織繭紬各屬倣行漸知機杼得旨
嘉獎

十一月乙未朔賜段飛龍等六十人武進士及第出身有差○丙
申吉慶緣事革職調安泰爲戶部右侍郎以阿永阿爲刑部右侍
郎○己亥河南楊橋漫工合龍命於工所建河神祠○庚子諭
沈德潛來京進所選國朝詩別裁集求爲題辭披閱卷首卽冠以
錢謙益伊在前明曾任大僚復仕國朝人品尙何足論卽以詩言
任其還之明末可耳何得引爲開代詩人之首又如慎郡王以親

藩貴介乃直書其名至爲非體更有錢名世在雍正年間獲罪名教亦行入選甚至所選詩人中其名兩字俱與朕名同音者雖另易他字豈臣子之誼所安且其閒小傳評註俱多紕繆沈德潛身旣老憤而其子弟及依草附木之人遂憑爲此斷不可爲學詩者訓朕願可輕弁一辭乎已命內廷翰林逐一檢刪爲之別白正定矣至朕自來加恩於沈德潛者特因其暮年晚遇人亦謹愿無他是以令其在家食俸加晉頭銜以示優恤然莊有恭前任蘇撫時曾奏及伊子不知安分時爲規戒俾不至多事累及伊父此正莊有恭存心公正所以保全沈德潛者不少見詩選刻已數年陳宏謀則近屬同城尹繼善雖駐江甯亦斷無不行送閱者使能留心如莊有恭據理規正不但此事早知檢點卽其子弟等羣知約束安靜居鄉其所裨於沈德潛者豈淺鮮耶陳宏謀無足論而尹繼

善佯爲不知之錮習雖朕屢經諄諭尙執而不化耳著將此傳諭尹繼善陳宏謀令其知所省改○定京員改補外任仍准戴軍功賞卹例○辛丑裁歸化城都統綏遠城右衛西安副都統青州將軍移察哈爾都統駐張家口左右翼副都統駐遊牧邊界○丙午諭軍機大臣等據徐垣奏黔省新開南明河徒勞無益請查勘停止一摺已有旨諭部前此周人驥奏請開河原爲運鉛而設若仍不利舟行且於官民均有未便自不應復行迴護前說貽累地方但愛必達前任總督數年此事原委諒所深悉何以未行奏聞著將該處河道實在情形若何及該撫前後辦理有無意存迴護之處一併據實奏覆並著傳諭吳達善令其秉公確勘實在情形卽行據實妥議具奏尋愛必達奏此河前經撫臣親往查閱尙易開修會摺奏准隨委員辦理試運嗣臣赴楚過黔詢據撫臣稱河道

見無阻滯須歲修可久至黔省各處河道均一綫溪流今由新河
運鉛實較川江爲穩惟連雇水手未悉路徑不免淺阻耽延得旨
覽此語究屬迴護吳達善奏見自滇赴黔勘明另奏得旨周人驥
辦事究竟如何據實奏來○丁未免河南祥符等四十三州縣漕
糧漕項有差○戊申諭原任侍郎錢陳羣久歷卿貳兼直內廷年
逾七旬學問優裕前以養病回籍有旨在家食俸用資頤養今來
京慶祝召對之次見其神明不衰而居鄉素稱恪謹著加恩賞給
尚書銜以昭優眷○壬子以索琳爲浙江布政使調梁鶴鴻爲山
西按察使以輔德爲河南按察使由甘肅肅州道遷○癸丑諭本日尙書
伍齡安讀加上皇太后尊號表文舛錯甚多復不相連屬本年
皇太后七旬慶典天下臣民同深歡躍執事人員自應倍加敬
慎伍齡安前因贊讀較優加恩擢至大員此次讀表並不敬謹矧

誦致有舛錯實屬怠忽非尋常失儀可比著革職賞給贖禮郎銜
仍在贊禮郎上效力贖罪○甲寅加上 皇太后徽號曰 崇慶

慈宣康惠敦和裕壽純禧恭懿皇太后○以永貴爲禮部尙書○

乙卯 上詣慈寧宮侍 皇太后宴綵衣舞奉觴親王皇子皇孫

額駙等以次進舞禮成○丙辰 御製 聖母皇太后七旬萬壽

連珠○以勒爾森爲左都御史德保爲吏部侍郎由署兵部○辛

酉調錢汝誠爲戶部右侍郎以張泰開爲刑部右侍郎仍留順天

學政任由左副都御史遷○以梁國治署左副都御史由廣東惠潮嘉道督蔡鴻業

署刑部右侍郎由廣東糧道署○授玉素布爲參贊大臣駐葉爾羌○壬

戌大學士等議奏據內務府郎中戴保住控侍郎吉慶前署殺虎

口監督傳察納承辦西直門右道工程浮銷八千九百餘兩審保

傳察納代吉慶彌補賠修之項輒於奏銷時浮開吉慶係總理大

員明知冒銷不行查問均罪無可寬應將吉慶傳察納照監守自盜例擬斬監候秋後處決副都統傅景接管石工訊不知情但扶同吉慶參奏戴保住應照都統將軍貪婪副都統不行糾參發覺審實例降三級調用不准抵銷得旨吉慶傳察納俱依擬應斬著監候秋後處決傅景見派駐藏著加恩照所降之級從寬留任俟差竣回京視其如何奮勉出力之處再降諭旨○癸亥軍機大臣等議覆葉爾羌辦事都統新柱等奏回人以普爾錢文兌易新錢不能全交等語查葉爾羌鑄錢一年得八萬餘騰格阿克蘇又開鼓鑄與舊普爾參雜行使自可流通無庸急爲收舊俟新錢鑄至十萬騰格時舊錢收盡自當停鑄或尙有舊錢仍行添鑄以盡收舊錢爲度每月不限定數至局鑄無多量減工役一半均應如所奏從之○甲子諭前因西陲平定新疆廣闊所有移駐大員官兵

歲需養廉經費比前或致增多是以特命在外辦事大臣等詳查奏聞頃據舒赫德覆奏軍機大臣通行較覈則葉爾羌喀什噶爾等城駐防應需各項合之陝甘節省諸費視未用兵之前不但絕無所增實可減用三分之二其屯墾自給之糧旣可不糜運費且將來種地日開所入倍當充裕又不在此時約計之內此皆一一指數可按者前用兵之初庸愚無識之徒好生浮議朕固不屑深辨今武功大定又或以長駕遠馭不無多耗內地物力爲疑今經查覈不但未曾多費而且有所節省夫天子不言有無國家有當用者雖累鉅萬不可惜也朕非錙銖較量但因西陲用兵始末所關不得不詳爲剖析以曉庸眾俾知此番武定並非耗帑勤遠之爲將此通諭中外知之

十二月辛未軍機大臣等奏據俄羅斯送出之瑪哈沁色布騰等

解京訊係前在阿勒坦和碩戕害庫車辦事布政使德舒等屬實
交刑部正法報聞○丙子宗人府奏請以故奉恩將軍啓昭庶子
麟智襲職得旨此奉恩將軍著麟智承襲但定例降等遞封至奉
恩將軍雖無可降之等然未經出缺以前其嫡妻所生之子年已
及歲卽考試封奉恩將軍是多一奉恩將軍矣殊屬大優嗣後此
等奉恩將軍之子應封時暫行賞給五品虛銜仍食原錢糧俟應
襲之奉恩將軍缺出再行承襲將此永著爲例○戊寅諭熊學鵬
奏廣西興安縣緝獲湖南湘鄉人鄧廷賢等私刻印票冒差需索
一摺以該犯楚人歷經楚地該撫馮鈐並未奏聞傳旨令其查覆
今據奏到自請交部議處並將藩臬道府州縣等一槩列參未免
惶遽失措且以鄰省獲犯不無中存芥蒂均非封疆大臣持正奉
公之道督撫統轄全省地方偶有匪徒越境滋事在本縣本府自

不能辭失察之咎至司道以上所轄既廣卽不當盡干嚴譴況在撫臣朕豈卽以一二緝案督辦不前定其殿最耶諒中外臣工所宜共喻者是馮鈐所奏過當之處於率屬已不得其平若因此而歸咎熊學鵬自生嫌隙則於政體官方所繫尤爲重大督撫同駐省會凡事固當和衷共理卽地屬鄰封其中會咨協濟之處在國家並非二事如馮鈐於此案知會到省方當深服熊學鵬嗣此每有見聞共期實心扶助所見方爲遠大設以私心未化因而膜視掣肘幾置公事於不問在督撫爲不知大體在朝廷亦安用此大臣從前鄂爾泰等在封疆中已爲不數見之材然以意見不合遂與李衛等抵牾生釁持因朝綱整肅勢不能成黨援門戶之漸然自來外吏畛域相持久成惡習不可不深引爲炯戒也將此通諭各省督撫知之○癸未兵部等部議覆四川總督開泰奏石砬一

司界在川楚間與內地州縣接壤幅員千餘里土著流寓錯雜經
臣前議暫移同知駐紮官民究不無觀望不若竟設流官俾歸盡
一將該土司改爲直隸石砭同知量設佐雜汛防分營其應襲世
職照苗疆例改授土通判不干與民事該土司原有另徵草籽秋
糧等銀卽定爲正額以抵同知增添養廉從之○乙酉諭工部奏
各省卓異官引見後向例文職賞給朝衣武職賞給蟒袍由工部
領銀製造轉發該員等不能久候親領易致書役等冒領隱匿諸
弊嗣後請停止賞給一摺卓薦人員旌以章服雖沿倣車服以庸
之義第行之日久漸成具文司事官吏等領值既有虛浮工料又
非精好及由提塘分發展轉弊生不惟本員實用無裨且恐轉致
勒索停其製給實屬允當但違請議裁伊等循績旣昭雖回任候
升自應卽示獎勵嗣後著加恩循照內官京察一等者令於引見

准其卓異時各准加一級仍註冊回任候升著爲例○戊子命外
官迴避內外兄弟○是歲朝鮮來貢○會計天下民穀數各省通
共大小男婦一萬九千八百二十一萬四千五百五十五名口各
省通共存倉米穀三千四百七十二萬三千一百七十五石二斗
七升七合五勺零